

Obavještenje o Odluci visokog predstavnika da ukinu zabranu izrečenu Stipi Babiću Odlukom visokog predstavnika od 16. septembra 1999.

Svojom Odlukom od 16. septembra 1999. godine ("Odluka iz 1999. godine"), visoki predstavnik je smijenio sa javne funkcije gospodina Stipu Babića. Navedenom Odlukom takođe je zabranjeno g. Babiću obavljanje bilo koje zvanične, izborne ili imenovane javne funkcije, kandidovanje na izborima i obavljanje funkcije u političkim strankama ("zabrana"). Odlukom iz 1999. godine je dalje izričito utvrđena mogućnost ukidanja zabrane prema isključivom nahođenju visokog predstavnika.

Na osnovu pažljivog razmatranja predmeta g. Babića i nakon što je zaključeno da više ne postoje razlozi za njegovo smjenjivanje, te da on više ne predstavlja prijetnju za implementaciju mira, institucionalnu cjelovitost odnosno demokratiju u Bosni i Hercegovini, odlučio sam da ovu zabranu ukinem. Stipi Babiću se ovim izričito dozvoljava vršenje zvanične, izborne ili imenovane javne funkcije, kandidovanje na izborima i obavljanje funkcije u političkim strankama.

Ovakav ishod opravdavaju principi pravičnosti, pravilnog upravljanja i razboritog ispunjavanja međunarodnog mandata visokog predstavnika, kojima se uzima u obzir ravnoteža između zaštite državne stabilnosti i prava pojedinaca.

Ovom Odlukom ne dovodi se u pitanje validnost Odluke iz 1999. godine. Ovom Odlukom se ne ovlašćuje g. Babić da se automatski vrati na dužnostsa koje je smijenjen na osnovu Odluke iz 1999. godine. Takođe, ovom Odlukom, njemu se ne daje pravo na

odštetu po osnovu bilo koje naknade, drugih oblika neostvarenih novčanih beneficija ili privilegija odnosno statusa koje je izgubio kao rezultat Odluke iz 1999. godine.

Ova Odluka ne predstavlja amnestiranje nego prospektivno ukidanje Odluke iz 1999. godine. Odluka iz 1999. godine se ne briše i ostaje integralnim dijelom zakonodavne evidencije Bosne i Hercegovine.

Ovom Odlukom se ne utiče na pravo visokog predstavnika da ponovno smijeni g. Babića ukoliko se ustanovi da je isti, tokom budućeg obnašanja javne funkcije, prekršio svoju priseguda će poštivati Ustav Bosne i Hercegovine i postupati sukladno Općem okvirnom sporazumu za mir u Bosni i Hercegovini, prisegu koja je slobodno data kao uslov koji prethodi ukidanju zabrane.

Ukoliko su odredbe ove Odluke u suprotnosti s domaćim zakonodavstvom u vezi s bilo kojim od predmeta koji su njome obuhvaćeni, ova Odluka će biti mjerodavna. Odluke visokog predstavnika imaju veću pravnu snagu i prednost u odnosu na domaće zakonodavstvo koje je s njima u suprotnosti. Ovom zakonodavnom izjavom se deklarativno obuhvaćaju postojeće i buduće odluke visokog predstavnika.

Ova Odluka stupa na snagu odmah i ne zahtijeva preduzimanje nikakvih dodatnih proceduralnih radnji.

Ova Odluka se objavljuje odmah u "Službenim novinama Federacije Bosne i Hercegovine".

Sarajevo , 4. novembra 2005.

Paddy Ashdown

Visoki predstavnik